



## CAUSES DE RECUSATION

proposées par Monsieur le Duc de Beaufort,  
Messire Iean François Paul de Gondy Arche-  
uesque de Corinthe & Coadjuteur de Paris,  
Monsieur de Broussel Conseiller en la Cour,  
Monsieur Charton President aux Requestes  
du Palais & autres.

## CONTRE M<sup>RE</sup> MATHIEV MOLE

*premier President au Parlement de Paris, Mr  
Molé de Champlatreux son fils Conseiller Hono-  
raire en ladite Cour, & leurs parens & alliez  
au degré de l'Ordonnance.*

**L**A RECUSATION est vne deffence du droit naturel.  
C'est pour conseruer les biens, l'honneur ou la vie, qui  
sont les trois choses qui composent l'homme, son estat  
& sa condition.

C'est pour cela que les Romains ne forçoient jamais les par-  
ties de prendre des Iuges suspects. Quoy qu'ils fussent choisis  
par le sort, il restoit encore la liberté de les rejeter. L'on n'estoit  
pas mesme obligé de dire precisément les causes de recusation.  
Il suffisoit que les soupçons & les deffiances fussent dans l'opi-  
nion & dans la pensée des parties: *Hunc nolo illum nolo*. C'estoit  
la formule des recusations.

Les Magistrats mesmes en la personne desquels residoit l'autho-  
rité de la iurisdiction souueraine, n'estoient point exceptés de  
la Loy generale: *Qui iurisdictioni præst*, dit la Loy, 10. *de iurisdic-  
tione au Dig. neque sibi ius dicere debet, neque uxori, liberisue suis,  
neque libertis, vel ceteris quos secum habet.*





2

Nostre Iurispudence n'a pas esté moins sage que celle des Romains. Il n'y a pas vne de nos Ordonnances qui parlent des recusations, qui ne comprennent tous les Iuges. Les Presidensy sont desnommés & tous les Chefs de la Iustice de quelque qualité qu'ils soient.

Les Parlemens tous entiers par les mesmes Ordonnances peuvent estre refusez. Il ny a point de Compagnies Souueraines, il ny a personne qui se puisse dispenser de l'ordre des Iugemens.

L'Ordonnance de Charles huit de 1593. Article 64. dit bien dauantage. Elle deffend formellement à ceux qui demeurent Iuges de la recusatation, d'en laisser la decision à la religion de celuy que l'on refuse. L'on ne croit point pour lors aux Aristides ny aux Catons; il ny a point de probité qui soit à l'esprouue de nous mesmes, nostre interest nous voile les yeux, & nous ne sommes plus ce que nous estions au parauant, dès le moment que la chose nous touche, ou qu'elle regarde nos parens & nos alliez.

Cela presupposé que toutes sortes de personnes peuvent estre recusées, qui est vne proposition dont Monsieur le premier President ne doute pas luy mesme, puis que dans cette occasion, il a desia passé par trois fois le Barreau; il ny a qu'à examiner si les causes de recusatation sont receuables.

Dans l'accusation, il est question entre autres choses de sçauoir si l'on a dit ce que les tesmoins deposent qu'il falloit tuer Monsieur le premier President.

Peut-il y auoir vn moyen de recusation plus pertinent & plus admissible. Il est question de sçauoir si l'on a eu dessein sur la personne de Monsieur le premier President. Il ny a rien qui soit plus precieux que la vie, & qui nous soit plus sensible.

A la verité l'on permet bien à vn homme de repousser la force par la force, de prendre les armes pour sa deffense. Quelques resentimens que nous ayons pour lors, nous pouuons bien nous faire Iustice, parce que la premiere loy est nostre conseruation.

Mais dès le moment que la Iustice publique, qu'un autre Tribunal que le nostre, se trouue saisi de nos interests, nous ne sommes plus les Maistres de la vindicte, nous ny pouuons auoir aucune part.

Et de fait si Monsieur le premier President demeroit Iuge.



De quel front, & avec quel visage pourroit-il interroger les accusez. Ne seroit-ce pas vne chose que les siecles passez n'ont iamais veu, & que la posterité ne verra iamais. Ne seroit-ce pas vn monstre dans la Iustice, de voir Monsieur le premier President en sa place demander à Monsieur le Duc de Beaufort, à Monsieur le Coadjuteur, à Monsieur de Broussel, à Monsieur le President Charton, & à tous ceux que l'on a malicieusement engagez dans l'accusation. *N'aués vous pas eu dessein sur ma vie, n'aués vous pas comploté contre moy?*

Vn homme qui profere ces paroles, qui se figure ces Meurtriers, qui les voit en sa presence, qui se les represente le poignard à la main prests à l'egorger, & à resprendre son sang, qui croit à son imagination plustost qu'à la verité, demeurera pour lors sans emotion? Il conseruera la liberte entiere de son esprit, l'amour de luy mesme ne preuadra point sur la Iustice? Certes, il faudroit que Monsieur le premier President fust d'une autre nature que tous les autres hommes pour n'estre point touché d'aucun ressentiment, & pour considerer avec indifferance les personnes, le crime, & l'accusation.

Les accusez peuuent dire des à present que Monsieur le premier President est bien esloigné de cette égalité & de cette indifferance de Iugement, que toutes les loix desirent dans la personne des Iuges.

Il a tousiours fait sa cause propre de l'accusation dont il s'agit. Tout Paris sçait qu'il y a eu de ses domestiques, & d'autres personnes qui sont d'un rang plus esleué, qui ont esté en plusieurs maisons, pour demander si l'on ne sçauoit pas que Monsieur le Marquis de la Boulaye estoit allé au logis de Monsieur de Broussel le iour qu'il se fit quelques bruits & quelques murmures, & s'ils n'en vouloient pas deposer.

Il a aussi tesmoigné publiquement parlant de l'Instruction du procez, que Messieurs les Commissaires de la Cour ne sçauent pas faire des Informations, & que le Lieutenant Criminel entendoit bien mieux cela qu'eux.

Tout Paris sçait encore la familiarité & la communication qu'à eue le nommé la Ralliere avec Monsieur le premier President, & comme durant le cours de cette affaire il est allé dans sa maison à toutes heures, & mesme de nuit. Cependant c'est la Ralliere



qui s'est meslé de cette haute calomnie, & qui a fourny les témoins qui font la pluspart ses Commis & ses Domestiques. De sorte que toute cette conduite fait voir comme Monsieur le premier President a tousiours considéré son interest dans la presente accusation.

Mais cette haine mortelle n'a pas commencé d'aujourdhuy contre les accusez. Apres le retour de Ruel, Monsieur le premier President publia par tout qu'ils auoient voulu esnouuoir vne sedition pour entreprendre sur sa personne, quoy que tout le monde sçache les soins qu'ils ont apportez en ce temps-là pour sa conseruation, & comme ils l'ont souuent preferée à leurs propres vies.

Monsieur le Duc de Beaufort ayant présenté plusieurs Requestes pour sa Iustification, il les a tousiours eludées par ses artifices, & il l'auroit tousiours laissé en proye à la calomnie & à la supposition, sans qu'il s'est trouué des conjonctures dans lesquelles on n'a peu continuer l'oppression contre luy.

Monsieur de Broussel n'a pas aussi esté exempt de sa haine, il a parlé en toutes rencontres tres desaduantageusement de luy,

Il a pareillement fait plusieurs fois des discours contre l'honneur & la conduite de Monsieur le Coadjuteur. Il l'a voulu faire passer pour vn esprit entreprenant, & dit en beaucoup d'endroits qu'il falloit arrester le cours de ses pratiques & de ses mauuais desseins.

Il l'a traité de mespris lors qu'on en parloit avec respect, ayant esté proposé dans vne Conference de renuoyer pardeuant luy vn different Ecclesiastique, ou Madame l'Abbesse de Chelles auoit interest. Il dit, *Que c'estoit vn beau renuoy que de les renuoyer à la Fronde, que la Fronde ne pouuoit pas porter iusques à Chelles.*

Monsieur le Coadjuteur estant allé chez Monsieur le premier President pour se plaindre de l'entreprise que Monsieur l'Euesque de Bayeux son fils auoit faite en qualité de Tresorier de la Sainte Chapelle, sur la Iurisdiction de Monsieur l'Archeuesque de Paris; il le traita avec des paroles indecentes & de mespris, comme s'il eust ignoré sa naissance & sa dignité.

A l'esgard de Maistre Guy Ioly Conseiller au Chastelet, il ya eu aussi des inimitiez precedentes qui pourroient exciter ses ressentimens.



Il présenta vne Requeste quinze iours auparauant l'accusation dont il s'agit, par laquelle il demanda qu'il fust permis d'informer de la violence, que plusieurs gens armez voulurent faire en la maison de Monsieur le premier President, lors que les Rentiers y furent pour demander Iustice, & instruire Messieurs les Deputez de la Cour de l'inexecution des Arrests & de la Declaration.

Cette requeste luy fut deslors si sensible qu'il la prit pour vne iniure. Il dit hautement à Monsieur Laisné, qui en estoit Rapporteur, c'est contre moy que cette Requeste est présentée, & qu'on a dessein d'informer.

Et de fait il en fit paroistre son ressentiment. Il fit plainte de ce qu'on auoit assemblé les Rentiers en sa maison par des Billets affichez, que c'estoit vn dessein d'entreprendre sur sa personne. Et il porta si loing cette plainte qu'il mit mesme des Billets entre les mains de Monsieur le Procureur General pour en informer.

Cette iournée a encore produit vne autre cause de recusation à l'esgard dudit Ioly; car s'estant plaint de la part de tous les Rentiers des hommes armez qui auoient paru dans la maison de Monsieur le premier President; Monsieur de Champlatreaux son Fils, accompagné de cinq ou six hommes d'espée, le prit par le bras, le mal traita de paroles, le menaça d'estre son Iuge. Et l'affaire eust bien passé plus auant si vn de Messieurs les Conseillers ne les eust separez.

Comme Maistre Guy Ioly est l'un des Syndics des Rentiers, il a encore raison de craindre que Monsieur le premier President ne soit son Iuge. Il a tesmoigné vne haine mortelle contre tous ceux qui ont esté nommez Syndics. Il les a traitez de seditieux, & sa passion a paru si grande, qu'en plein Bureau de l'Hostel-Dieu, il a dit en presence de plusieurs personnes: *Que les Syndics vouloient faire vne Chambre des Communes.*

Monsieur le President Charton, qui est l'un des Syndics a aussi présenté vne Requeste de recusation de sa part: mais comme tous les moyens sont communs avec tous les autres, il s'est contenté de les employer, & d'en demander acte.

Cependant l'on pretend renuerser tous ces moyens de recusation, dont vn seul seroit suffisant dans les affaires moins impor-



cantes, sous pretexte que Monsieur le premier President n'est point partie, & la poursuite ne se fait seulement que sous le nom de Monsieur le Procureur General.

Mais les accusez peuvent dire, que c'est vne illusion à l'ordonnance & à la Iustice.

Premierement, les parties formelles ne sont iamais recusées. La raison est qu'il faut necessairement trois personnes qui composent tous les Iugemens, l'accusateur, l'accusé, & le Iuge.

Toutes ces trois personnes sont tousiours distinctes & separées, mais il faut absolument qu'elles soient establies, pour que l'on puisse dire qu'il y ait contestation.

Si les parties sont absolument necessaires au procez, ce ne sont donc iamais les parties que l'on refuse, autrement on destruiroit la iurisdiction en la voulant establi. Et ainsi c'est vne subtilité toute nouuelle que la pretétion de Monsieur le premier President. L'ordonnance ne dit pas, que les parties ne peuvent estre Iuges en leur propre cause, c'est vne chose dont on ne doubta iamais, mais que l'on ne peut pas estre Iuge dans vne affaire, ou nos amis se trouuent interessez, ou dans lesquelles nous pouuons prendre part directement ou indirectement.

Vn Creancier de la partie dans les affaires Ciuiles, qui ne sont pas si importantes que les Criminelles, ne peut pas seulement demeurer Iuge.

Lors qu'un procez est intenté, un Iuge est recusable, s'il se trouue seulement qu'il a mangé avec vne des parties, parce qu'il faut que la Iustice soit exempte de toutes sortes de soupçons.

C'est vn vsage parmy nous, qu'encores que par l'ordonnance l'on peult renuoyer l'accusé pour l'instruction & pour le Iugement du procez, pardeuant son Iuge naturel, lors que les appellations se trouuent temeraires. Neantmoins la Cour ne le fait iamais, l'on fait violence à la Loy & à l'ordonnance, de peur qu'il ne reste quelque ressentiment au Iuge contre l'accusé, contre lequel il n'a autre subiet de haine, sinon qu'il s'est plaint de ses Iugemens.

L'on sçait aussi qu'en matiere Criminelle, ceux qui ont instruit le procez, ne sont iamais Rapporteurs; l'on apprehenderoit qu'ils ne feussent vn peu trop amoureux de leur propre ou-



urage, bien que ce soient des actes de Iustice, & qui ne se font que par son autorité.

Nous auons vn texte tres-singulier dans les Decretales, qui est le Chapitre *Causam*, au tiltre *De Iudicijs*. Il y auoit contestation entre l'Abbé de Vendosme & l'Archidiacre de Chartres. La cause fut renuoyée par le Pape à l'Euesque de Paris, & à son Archidiacre, mais ayant esté reconneu par la suite, que l'Archidiacre de Paris auoit vne pretention, qui approchoit vn peu de celle de l'Archidiacre de Chartres, il fut incontinent recusé. Le Pape commit d'autres Iuges : car pouuans estre touchez par quelque legere comparaiſon de leurs intereſts, on ne voulut pas laisser le moindre pretexte à la partie de se plaindre des premiers Iuges qui auoient esté donnez.

Quand vne partie interiette appel d'une Sentence renduë par le Iuge de son Domicile, si pendant l'appel, & auparauant qu'il soit vuide, il luy suruient vn autre differend, il peut demander son recours & decliner de son Iuge naturel : c'est ce que nos Couſtumes appellent l'exemption par appel, pour monſtrer qu'il ny à rien de plus delicat que la Iustice, & qu'il est iniuste de vouloir obliger des parties de se deffendre deuant vn Iuge, qui peut estre seulement bleſſé par l'appel de sa Sentence, qui est meſme vne chose indifferente aux Iuges qui s'acquittent de leur conscience & de leur deuoir.

Il est donc estrange, de voir que Monsieur le premier President pretende se mettre au dessus des Loix, & qu'il veuille faire exception de sa personne.

Il ſçait bien que ces iours passez, il iugea luy meſme que Monsieur le President Charton deuoit s'abſtenir de l'affaire de Maître Guy Ioly, bien qu'il ny soit intereſſé en façon quelconque, qu'il ne soit point partie, qu'il ne soit point compris ny deſſigné dans les Informations; & que ce qu'il auoit dit dans la Grand Chambre de cet Affassinat qualifié, estoit pluſtoſt pour la ſeureté publique que pour la ſienne.

Monsieur le premier President, n'est-il pas plus intereſſé dans ce rencontre, que n'estoit Monsieur le President Charton, dans l'affaire dudit Ioly. Toutes les informations ne ſont remplies que de pretendus deſſeins sur sa personne, d'iniures contre sa conduite & ses actions. Ses ſeruiteurs & ses domestiques ont esté, com-



me dit est, rechercher des tefmoins contre les accusés. Il à pris part des le commencement à l'accusation, il à parlé des depofitions par aduance, car les premieres Informations ayant esté leuës, & Monsieur le Coadiuteur ayant voulu dire quelque chose du tefmoin qui parloit de luy; Il luy dit publiquement, *que ce n'estoit pas dans sa place qu'il se deuoit iustifier, & qu'on en verroit bien d'autres?* Tellement qu'il paroist par la que c'est luy qui à conduit tout l'ouurage, puis qu'il estoit si bien informé de ce qui se deuoit passer dans la suite, & par l'euenement.

Enfin la Cour se peut ressouuenir que quand il parla de ces pretenduës coniurations qui deuoient enuveloper toute la Maison Royale, lors qu'il parla du bouleuerfement de la Monarchie, des secrettes intelligences avec les Ennemis; Il dit aussi qu'entre tous ces grands desseins il estoit question de sçauoir, *s'il tiendrait de formais la vie par precarre.*

N'est-ce pas proprement vne plainte publique qu'il à faicte des ce temps-là? Y auoit-il rien de semblable dans la plainte de Monsieur le President Charton? à ton Instruit le Procès dudit Ioly, sur ce que ledit sieur President Charton auoit dit, comme l'on iustruit celuy d'aujourd'huy dans la personne de Monsieur le premier President, & pour venger les iniures & la violence qu'il pretend qu'on luy à voulu faire?

C'est donc son interest que l'on traite. Il ne faut pas considerer s'il n'est pas partie formelle, c'est tout de mesme que s'il l'estoit.

Tous procès sont composés de deux points.

Le premier est l'information & les formalités de Iustice, qui est le moins considerable.

Le second est le fonds & le principal.

Dans la procedure, Il est vray que Monsieur le premier President ne paroist pas. Pour le moins il n'est pas ioint à Monsieur le Procureur General publiquement, ny Monsieur le Procureur General avec luy.

Mais dans le principal, il s'agit de sçauoir si on a eu dessein d'attenter à sa personne. Peut-on dire qu'il ny soit pas interessé, n'est-ce pas pour luy que l'on a recherché avec tant de soing des accusations supposées, & que l'on auoit pourfuiuiues dans le commencement avec tant de chaleur. Quoy il sera iugé qu'on a eu dessein



dessein de l'assassiner & de le perdre, & ce ne sera pas sa propre cause, ce ne sera pas son fait, cela ne le touchera aucunement?

Mais qui sont ceux qui demandent qu'on ne leur donne point de Iuges suspects?

C'est Monsieur le Duc de Beaufort, illustre par sa naissance, par la Grandeur de son courage & de ses actions.

C'est Monsieur le Coadiuteur, qui distribuë aux hommes des graces du Ciel, à qui l'on desnie ce qu'il y a de plus commun dans la Iustice sur la terre.

C'est Monsieur de Broussel qui a tant d'amour & de zele pour le public.

C'est enfin Monsieur le President Charton, qui a tousiours rempli dignement sa place, quel'on veut faire iuger par leurs propres ennemis, par ceux-là mesme qui se trouuent interessez dans l'affaire.

Il y a d'autres personnes, qui ne sont pas si illustres que l'on a aussi enueloppées dans la mesme accusation.

L'on y a engagé les Scindics des Rentiers, parce qu'ils ont trauaillé utilement pour le public, qu'ils ont donné des moyens pour empescher la continuation des brigandages, & des diuertissemens de deniers qui se font tous les iours par les Fermiers, par les Receueurs, & par les Traitans. Et l'on a esté iusques à ce point de malice, de vouloir persuader au peuple, que leurs trauaux & leurs conduittes n'estoient qu'une caballe, bien qu'il ne faille que lire le Factum, & les memoires qu'ils ont presentées à la Cour, pour voir si leurs plaintes ne sont pas iustes, & s'ils pouuoient iamais tant descourrir de maluersations, comme ils ont fait dans les Rentes de l'Hostel de Ville, s'ils eussent eu d'autres desseins que la deffense de leurs propres interests.

Cà donc esté vne faction premeditée d'engager les Scindics dans l'accusation, l'on a creu ruiner l'ouurage qu'ils ont si courageusement commencé, & se deffaire ainsi des personnes, qui demandoient Iustice pour le public, aussi bien que pour eux-mesmes.

Les accusés ne craignent pas icy de rompre la modestie, & de publier la generosité de leurs desseins. Il n'y a iamais eu d'accusés qui ne l'ayent fait en pareil rencontre. Tesmoing l'exemple me-



morable de Scipion l'Affricain, lequel ayant esté accusé, fit incessamment ressouvenir ses Iuges de ses victoires, de sa conduite, & de ses actions: *Restabat* dit vn ancien, *ut Tribunus apud populum sine populo gereret, de fertis que in foro cum magno calumnia sua ludibrio solus moraretur: cuius deuitandi ruboris causa in Capitolium processit, deque accusatore Scipionis venerator est factus.*

Tesmoing encore l'accusation contre Metellus, laquelle fut reietée par la seule reputation de sa vie; *Indignum rati integritatem tanti viri exigua cera & paucis litteris perpendi.*

Les accusés ne demandent pas qu'on les traite avec les memes aduantages. Ils sont prests de rendre compte de toute leur vie à la Cour & au public, mais que ce soit au moins deuant des Iuges des-intereffés, & qui puissent estre despoüillés de toutes sortes de ressentiment.

Mais ce qui les oblige encore à insister plus fortement à la recusation des Iuges suspects, est la qualité des tesmoins qu'on leur represente, qui sont tous des gens de sac & de corde, des Socian-do, des Cantos, des sieurs de la Comette, des Pichons, des Marcassins, des Gorgibus, qui ont tous esté repris de Iustice.

Les vns bannis de leurs pays. Les autres condamnés à mort pour des Raps qualifiez. D'autres pour des vols & des brigandages.

Mais s'y l'on considere aussi la façon avec laquelle on a préparé cette accusation, l'on ne peut pas trouuer estrange les soupçons & les desfiances des accusés.

Ces tesmoins sont gens a qui l'on a donné des lettres de Cachet, signées d'un Secretaire d'Estat, pour aller en toutes sortes de lieux parler les premiers des personnes Sacrées & des affaires publiques, eschauffer les esprits sans pouuoir estre recherchez, ny estre reputés complices. Et pour rapporter toutes les paroles qui se diroient dans Paris, & les noms de ceux qu'ils auroient entendus parler.

Si cela auoit lieu, il n'y auroit point d'innocence à l'espreuve de la calomnie. Ce seroit vne Inquisition insupportable. L'on tiendroient mesme registre de nos larmes & de nos soupirs.

Au reste que deposent ces tesmoins qui ont esté si curieusement recherchés. Il ne se trouue aucune charge dans les informations. Ces coniurations contre l'Estat qu'on auoit si haute-



ment publiées, se trouuent toutes reduittes aujourdhuy à des affaires particulieres.

Les bruits & les murmures du Samedy matin vnziefine du mois de Decembre dernier, que l'on veut faire passer pour l'execution de ces grands desseins, ont-ils les couleurs qu'on leur a voulu malicieusement donner. Quelle connexité avec l'accusation presente. Quia paru dans cette occasion? y à t'on veu Monsieur le Duc de Beaufort, & ceux que l'on pretend auoir concerté toutes ses hautes entreprises? quelle conduite à t'on remarquée dans ce bel ouurage, où en estoient les dispositions?

Mais si les bruits & les murmures du Samedy matin, estoient l'effet de cette pretenduë coniuration, il se trouueroit que les accusateurs ne seroient pas les moins coupables.

Quoy vn homme de la qualité de Monsieur le Marquis de la Boulaye a tout le secret du dessein. On pretend qu'on luy en auoit confié l'execution. L'on dit qu'il s'est mis en estat de la faire reussir. Et cependant on ne l'arreste point pour en descouurir tout le mystere. Il paroist encore deux iours publiquement dans la Ville de Paris à la face du Roy & de toute la Cour. On le voit par les ruës sans suite. Il y auoit trois mois ce dit-on que l'on scauoit que toute cette conspiration se tramoit, on laisse pourtant toute la Maison Royale en proye à de si pernicious desseins, on ne songe point à la seureté du Prince, on l'abandonne au carnage espouuantable que l'on auoit préparé?

Quels sont les criminels dans ce rencontre? si cette conspiration estoit veritable, Monsieur le premier President qui la scauoit, pourroit t'il se garantir de reproches? ne seroit-il pas mesme le plus coupable d'auoir ainsi laissé l'Estat en peril, & les personnes les plus sacrées?

Cette coniuration concertée de longue main, que l'on fonde sur l'action du Samedy est donc imaginaire, les Accusés ne veulent pas faire ce tort à Monsieur le premier President, de croire qu'il eut voulu laisser au hazard de si funestes euenemens, toute la fortune de l'Estat.

Et ce qui l'auroit rendu d'autant plus coupable dans cette occasion, c'est qu'à l'ouuerture du Parlement, lors qu'il fit cette magnifique harangue, il ne parla que des desseins formez contre la seureté publique, des secrettes intelligences avec les ennemis,



des conspirations espouuantables. *Les ennemis, dit-il, sont parmi nous, ils sont au milieu de la Compagnie.*

Il sembloit deslors estre instruiet de tout, car la deposition des tesmoins & sa harangue se trouuent aujourd'huy n'estre qu'une seule & mesme chose. Ainsi quelle apparence de demeurer plus long-temps sans ruiner ces entreprises. Dans les crimes d'Estat les simples soupçons obligent à une exacte recherche, l'on ne scauroit trop tost preuenir le danger.

Il faut donc conclure que ces grands desseins, ces grandes conspirations dont on a parlé si publiquement n'estoient pas des conspirations contre l'Estat: mais plustost celle que nous voyons à present, laquelle on preparoit deslors par des discours publics & affectez, afin de gagner les esprits contre les accutez, contre des gens d'honneur, & qui ont tousiours resisté à la corruption du siecle.

Après cela Monsieur le Premier President peut-il demeurer Iuge?

L'Ordonnance est contre ceux qui se trouuent mesmes interessez indirectement.

Pour auoir seulement déclaré son sentiment auparauant qu'on ayt opiné sur l'affaire que l'on traite, l'on peut estre recusé. Et Monsieur le Premier President qui a fait des digressions, qui a traité d'autres matieres que celles qui se traittent ordinairement dans les ouuertures du Parlement, afin de parler des conjurations pretendues qui se formoient contre sa personne, resistera à toutes les Loix & à toutes les maximes, pour estre Iuge de ceux qu'il a mis au nombre de ses ennemis il y a long-temps; parce qu'ils ne sont pas de mesme sentiment que luy. Certes? cette pretention est bien estrange, elle scandalize la Iustice, la pudeur, & l'honnesteté publique.

Les accusez ne scauroient non plus dissimuler ce qui a esté dit par vn de Messieurs les Princes du Sang, lequel ayant enuoyé querir vn des proches parens de Monsieur de Broussel, il le chargea de l'asseurer de sa part, que monsieur son frere ny luy n'auoient point sceu qu'on eust engagé monsieur de Broussel dans l'accusation, & que c'estoit monsieur le Premier President qui l'auoit conduite luy seul.

Aussi depuis l'accusation, quelle affectation n'a point fait paroistre



estre Monsieur le Premier President pour demeurer Iuge.

Monsieur le Prince s'estant voulu retirer, il l'obligea de demeurer en sa place, de peur que ce ne fust vn preiugé contre luy, & affin qu'il peust opiner luy mesme en sa propre cause.

Et pour effacer la pudeur qui paroissoit desia sur le visage de Monsieur le Prince, il luy dit que c'estoit vne affaire publique, que toutes les regles deuoient cesser, qu'il y alloit de la manutention de l'Estat.

Les accusez reconnoissent à la verité, que la place que tient Monsieur le Premier President, le rend tres-considerable, toutesfois il leur permettra bien de croire que toute la fortune de l'Estat n'est pas renfermée en sa personne.

Mais où va toute l'accusation quand les tesmoins ne porteroient point leurs reproches. Ils deposent seulement qu'il falloit se defaire de sa personne. Il n'est point parlé qu'on se soit mis en aucun deuoir pour cela, l'on n'a point veu des hommes armez qui ayent assiegé la maison, qui l'ayent suiuy, qui l'ayent attendu sur le passage. Ce sont donc de simples discours dont deposent les tesmoins. Et c'est ce que Monsieur le Premier President appelle la manutention de l'Estat.

Des porteurs de Lettres d'espionnage dans vn Royaume libre, des tesmoins erigez en tiltre d'Office, des gens bannis de leur pays, condamnez à mort, vn Turc, vn Biarnois, vn Manceau deposent que Monsieur le Premier President est mal dans l'esprit du peuple, que tels & tels ont dit qu'il s'en falloit deffaire. Et c'est vn crime d'Estat au premier chef, dont il doit connoistre & demeurer Iuge.

Aureste quand l'accusation, dont il s'agist, auroit quelque chose de public, Monsieur le Premier President pourroit il en demeurer Iuge?

A la verité quelques Docteurs demeurent d'accord qu'encores qu'un homme fasse partie de quelque Communauté, d'un College, & d'un Chapitre, cela n'empesche pourtant pas qu'il ne puisse donner son suffrage, lors qu'il s'agit de l'interest de la Communauté en general.

Mais tous les Docteurs conuiennent en ce poinct, que lors que l'interest particulier se trouue joint à l'interest public, on n'a plus de part à la deliberation, parce que l'esprit des Iuges doit touf-



jours estre dans l'indifference, que nous ne conseruons iamais quand nous sommes interessez.

Nous auons vn exemple illustre de cette verité, qu'un de Messieurs a rapporté tres-iudicieusement au dernier iour en opinant sur la reculation dont il s'agist.

Le Duc de Biron ayant esté accusé de plusieurs crimes d'Estat, quelques-vns proposerent au Roy Henry I V. de se trouuer au Iugement du procez. Neantmoins parce qu'un des chefs de l'accusation estoit que le Duc de Biron auoit conspiré contre la personne, Ce grand Prince fit response qu'il craignoit n'estre pas bon Iuge de ses propres interets, qu'il luy feroit comme impossible de se deffendre des mouuemens de la nature. Et de fait il n'y assista point du tout.

L'Orateur Romain dit que dans les choses les moins importantes, nous ne pouuons iamais porter tesmoignage en nostre faueur: *Mors maiorum comparatum est, ut in minimis rebus homines amplissimi testimonium de sua re non dicerent. Africanus qui suo cognomine declarat tertiam partem terrarum se subegisset, tamen si sua res ageretur, testimonium non diceret. Nam illud in talem virum vix audeo dicere, si diceret, non crederetur.*

Et IESVS-CHRIST, qui estoit exempt de toutes sortes de passions, qui estoit la Iustice mesme & qui n'a point fait de difficulté de dire qu'il estoit la Verité, a neantmoins parlé du tesmoignage qu'il eust peu rendre de luy-mesme, comme si on n'eust pas esté obligé d'y deferer: *Si ego testimonium perhibeo de meipso, testimonium meum non est verum.*

La Loy vnique, *nequis in sua causa iudicet*, au Cod. ne fait point aussi d'exception: *Generali lege decernimus, neminem sibi esse iudicem, vel ius sibi dicere debere. In re enim propria iniquum admodum est alicui licentiam tribuere sententia.*

En fin Monsieur le premier President n'a pas raison de pretendre qu'il doit demeurer Iuge, par ce que c'est à sa dignité que l'on en vouloit & non pas à sa personne.

Au contraire, c'est plustost la consideration de son autorité, de son rang & de sa place, qui le doit faire exclure du iugement des accusez.

Il y a eu autrefois des personnes que l'on a renuoyées absous sans approfondir mesme l'accusation, par ce que ceux qui s'y trou-



uoient interessés estoient esleués aux premiers honneurs.

C'est ainsi que Cotta se guarantit de la poursuite d'Æmilianus Scipion, qui estoit sa partie, à plus forte raison s'il eust voulu estre son luge: *Homines verebantur ne precipue Scipionis Amilianamplitudini, damnatio eius donata existimaretur: Nolumus caput alierius petentem in iudicium triumphos & trophea spoliisque ac deuictarum nauium rostra deferre. Terribilis sit is aduersus hostem, cuius vero salutem ne insequatur.*

Les accusez esperent donc que la Cour rendra les premiers tesmoignages de leur innocence, en faisant abstenir Monsieur le premier President, ses parens & ses alliez de leur Iugement. Il a luy-mesme interest de ne point demeurer luge, afin que l'Arrest qui interuiendra contre les accusés ne soit point suspect s'ils sont coupables, ou quel'on ne l'accuse point d'aucune violence dans la poursuite, s'ils se treuent innocens.





